

1183.042.

1183

**AWIG-AWIG  
DESA ADAT PANGINYAHAN**



**KECAMATAN KUBU  
KABUPATEN KARANGASEM  
2019**

MURDHA CITTA  
AUM OM

Om Swastyastu, Om Awithnam astunama sidham, Putusing pesaban  
krama Desa Adat Panginyahan gumawe awig awig Desa Pekraman  
maka sepat siku siku pemeneh wastu kasidha Prayojana mamikabah  
Prasama angidep muah amangehaken kadi linging Awig awig iki;

**PRATAMA SARGAH  
HARAN LAN WAWIDANGAN DESA**

**Pawos 1**

- (1) Desa Adat puniki mawasta Desa Adat Panginyahan, selantur ipun kinucap miwah kasuratang sajeroning lekita Desa Adat Panginyahan.
- (2) Wawidangannya mawates catur desa, lwire :
  - ha. tepi wetan utawi kangin inggih punika Desa Adat Tianyar;
  - na. tepi kidul utawi kelod inggih punika Desa Adat Tianyar;
  - ca. tepi kulon utawi kauh inggih punika Desa Adat Tianyar;
  - ra. tepi lor utawi kaja inggih punika Desa Adat Pedahan Kelod.
- (3) Desa Adat puniki kapikukuhin tur kasanggra antuk kalih Banjar, inggih punika Banjar Adat Kanginan lan Banjar Adat Kawanana.

**Pawos 2**

Wawidangan Desa Adat Panginyahan kakuub antuk Tri Mandalaning Desa, lwire :

- ha. Utama Mandala pinaka palemahan Kahyangan;
- na. Madya Mandala pinaka palemahan sane kaanggen karang paumahan, tegal, genah wawangunan banjar, sekolah miwah sane siosan;
- ca. Nista Mandala pinaka palemahan setra, rurung utawi margi.

**DWITYA SARGAH  
PAMIKUKUH LAN PATITIS TATUJON**

**Pawos 3**

Desa Adat Panginyahan ngamanggehang tur mikukuhin :

- ha. Pancasila;
- na. Undang-Undang Dasar 1945;
- ca. Tri Hita Karana.

**Pawos 4**

Desa Adat Panginyahan ngamanggehang patitis tatujon, lwire:

- ha. ngutamayang tata prawertining agama Hindu;
- na. ngarajegang Awig-Awig, paswara miwah pararem Desa Adat Panginyahan;
- ca. ngawerdiang kawicaksanaan minakadi kapradnyanan maka larapan gumawe gemuh landuhing praja;



- ra. ngamanggehang kalih ngawerdiyang padruweyan desa, malarapan saking kawicaksanaan guna laksana manut darma prawerti;
- ka. ngarajegang darma agama lan darma negara.

## **TRITYA SARGAH SUKERTA TATA ADAT**

### **Palet 1 Indik Krama**

#### **Pawos 5**

Sane kabawos krama Desa Adat Panginyahan inggih punika :

- ha. sapa sira ugi sane jumenek magenah ring wawidangan Desa Adat Panginyahan lintang ring tigang sasih utawi satus lima dina;
- na. sapa sira ugi wed saking Desa Adat Panginyahan jenek magenah ring dura desa nanging kantun mipil ring sinalih tunggil banjar Adat sane wenten ring Desa Adat Panginyahan.

#### **Pawos 6**

Krama Desa Adat manut papalihan, lwire:

- ha. Krama Ngarep inggih punika krama sane sampun bulangkep tur sampun mipil ring banjar Adat saha maayahan saurah arih;
- na. Krama Balu inggih punika krama lanang utawi istri sane katinggal seda antuk rabinya;
- ca. Krama Nyapihan inggih punika krama sane palas marabian;
- ra. Krama Sorpa inggih punika krama sane durung bulangkep;
- ka. Krama Nyada inggih punika krama sanè sampun tan keni ayahan miwah papeson tur sampun polih lugraha ring sajeroning paruman;
- da. Krama Tamiu inggih punika sapa sira ugi saking luaring Desa Adat Panginyahan sane maagama hindu jenek magenah ring wawengkon desa nanging nenten mipil.
- ta. Tamiu inggih punika sapa sira ugi sane jenek magenah ring Desa Adat Panginyahan nanging nenten maagama hindu.

#### **Pawos 7**

Ngawit tedun makrama desa :

- ha. sapa sira ugi sane sampun bulangkep, malarapan antuk tateragan utawi pinunas ngaraga kadulurin antuk upakara mekandal ;
- na. sapa sira ugi krama Desa sane usan makrama, wastu malih mawali tedun makrama desa malarapan antuk :

**Palet 2**  
**Indik Kertha Desa lan Prajuru Desa**

**Pawos 10**

- (1) Desa Adat Panginyahan kahemong antuk Kertha Desa miwah kaenter antuk prajuru Desa.
- (2) Prajuru Desa lwire :
  - ha. Kliang utawi Bendesa;
  - na. Pamade;
  - ca. Penyarikan;
  - ra. Juru Raksa; lan
  - ka. Juru Arah utawi Saya manut pabuat.
- (3) Sane wenang kaadegang Kertha Desa inggih punika :
  - ha. sane nahen dados Prajuru Desa;
  - na. sane tatas ring dresta.
- (4) Kertha Desa kasudi antuk paruman desa, wawilangannyane gasal.

**Pawos 11**

- (1) Sane wenang kahadegang wiyadin kamanggehang dados keliang desa lwire :
  - ha. Krama Ngarep mapaayah-ayah saurah-arih ring desa;
  - na. nenten cedangga utawi sungkan-sungkanan;
  - ca. wikan mamawos miwah nyurat aksara bali utawi latin;
  - ra. tan nahen mabukti malaksana corah; lan
  - ka. mayusa pinih alit 30 warsa.
- (2) Pidabdab ngadegang prajuru desa :
  - ha. paruman desa ngawentenang saseliran. Pangawit paruman desa matujuwang sang pacang kahadegang dados bendesa utawi keliang desa. Yening kantos lintangan ring asiki sane katuju antuk paruman desa, yogya pinilihan;
  - na. munggwing ngadegang patengen, panyarikan, juru raksa lan juru arah saking panyudin bendesa utawi keliang desa sane kasungkemin antuk paruman desa;
  - ca. lamine madeg prajuru desa, wantah limang warsa, sajaba wenten kapialang;
  - ra. sane sampun nahen madeg pinaka prajuru desa, wenang kasudi malih sajroning paruman desa;
  - ka. yening wenten sinalih tunggal piwal kalaning kasudi antuk paruman desa, sang piwal punika wenang katiwakin panglokika. Yening tan manut paksanya yogya kabawosan



antuk paruman desa. Yening jati tuhu paksanya, paruman desa wenang nyudi sane siosan;

- (3) Ritatkala nyudi Kertha Desa utawi Prajuru Desa, sane patut rauh ring paruman inggih punika Krama Ngarep lan prajuru Sekaa Taruna.
- (4) Sane kasudi dados Kertha Desa lan Prajuru Desa wenang kawintenin antuk desa, magenah ring Pura Kahyangan Desa.

### **Pawos 12**

Kertha Desa lan Prajuru Desa kagentosin utawi kausanang malarapan antuk :

- ha. seda;
- na. sungkan-sungkakan;
- ca. magingsir saking wawidangan Desa Adat manut panglokika lan pararem;
- ra. mabukti malaksana corah, mamurug awig-awig lan pararem;
- ka. pinunas ngaraga tur sampun kasungkemin ring sajeroning paruman;
- da. tutug sengker pangadege sajawaning Kertha Desa.

### **Pawos 13**

- (1) Swadarmaning Kertha Desa inggih punika :
  - ha. ngicen pawarah-warah, tatimbang ring prajuru desa sajeroning ngenter desa;
  - na. niwakang pamidanda ring prajuru desa sane mamurug awig-awig miwah pararem desa.

Swadharmaning Keliang Desa :

- ha. midabdabin desa, krama desa, pacang ngupadi kajagadhitan sakala niskala, maka darsana awig-awig desa, pararem desa, nganutin uger-uger negara minakadi kojaring sastra Agama Hindu;
- na. ngarancana salwiring sane nyandang pacang wangunang, sane patut hayum, manut lokika desa kala patra. Sane mabuwat, kasidhan polih palugrahan guru wisesa;
- ca. mawosin salwiring wyawahara sane wetu sajroning Desa Adat Panginyahan, niwakang pamutus utawi tatimbang. Yening tan kasidhan kabawosan ring desa, prajuru desa ngaturang ring guru wisesa mangda kabawosan;
- ra. mratyaksa, nulingayang saparipolah prajuru desa, keliang banjar Adat, keliang dadya, para pamangku, minakadi sane siosan sane wenten sajroning wawengkon desa;

- ka. midabdabin pamargin salwiring aci-aci ring Desa Adat, taler nulingayang krama desa indike ngalaksanayang Panca Yadnya;
- da. prajuru desa wenang nyaggra salwiring pituduh, minakadi saraja karya saking guru wisesa, werat utawi ringan, sane yoga katiwak ring desa Adat;
- ta. pinaka duta pacang matemuang babawos ring sapa sira ugi, yan paindikan punika kapineh nyandang pacang marginin;
- sa. wenang ngawangunang langlang desa sane kabawos pacalang, sane patut ngalanglangin saraja karyan desa, nulinga katreptyan sawawengkon desa;
- wa. wenang ngawangunang sekaa-sekaa siosan manut pabuat.

#### **Pawos 14**

Palapeksaning prajuru desa Adat, lwire :

- ha. luput papeson manut pararem;
- na. polih tuas-tuasan manut dresta;
- ca. miwah sane siosan manut pararem.

#### **Palet 3**

#### **Indik Sangkepan lan Paruman**

#### **Pawos 15**

Mungguwing Sangkepan lan Paruman, lwire:

- ha. Sangkepan prajuru desa kamargiang setunggil jaga kamargiang aci ring Pura Kahyangan Desa, maduluran swaran kulkul maka tatenger, sane kamiletin antuk prajuru desa, pamangku, keliang banjar miwah sane siosan manut pabuat;
- na. Sangkepan utawi paruman desa kamargiang manut pabuat;

#### **Pawos 16**

Tata kramaning Sangkepan lan Paruman :

- ha. Sangkepan utawi paruman desa Adat kaenter olih prajuru, saha maduluran canang pengeraos;
- na. krama pamilet mabusana adat;
- ca. Tan kapatutang ngawetuang babaos utawi parilaksana sane tan becik. Yening mamurug, keni pamidanda manut pararem.

#### **Pawos 17**

- (1) Pamutus babawos kaaptiang mangda metu saking manah madasar paras-paros sarpanaya tur gilik-saguluk ngaptiang sukertan desa.



- (2) Yan tan sida gilik-saguluk, suara sane sareng akehan pinaka pamutus.

#### **Palet 4**

#### **Indik Kukul**

#### **Pawos 17**

- (1) Sajroning wawengkon Desa Adat Panginyahan, wenten babacakan kukul, lwire :
- ha. kukul desa;
  - na. kukul pura;
  - ca. kukul banjar;
  - ra. kukul dadia: lan
  - ka. kukul sekaa-sekaa siosan.
- (2) Mungging swaran kukul punika mangda mabhina-bhinayan sawiji sowang, manut sor singgih. Yening wenten swaran kukul pateh, karun wiyadin sawer, mangda kapastika salah sawiji, antuk sang madruwe.
- (3) Nepek kukul manut Tri Bharata Sandi, dharma, sima lan laksana, tegesipun :
- ha. dharma : swaran kukul maka cihna wiyadin tatenger upacara yadnya;
  - na. sima : swaran kukul maka cihna wiyadin tatenger panca bhaya;
  - ca. laksana : swaran kukul maka cihna wiyadin tatenger patedunan.
- (4) Indik tatepekan kukul manut dresta.
- (5) Unggwan nepek kukul :
- ha. yening nepek kukul tatenger upacara yadnya, wenang kukul sane wenten ring sowang-sowang genah upacarane;
  - na. yening nepek kukul tatenger panca bhaya, asing nampek genahe wenang katepek antuk sang rihinan manggihin bhaya punika, minakadi saking patuduh sang ngawiwenangang;
  - ca. yening nepek kukul tatenger patedunan, ugi kukul sane kadruwe antuk sekaa, krama, sane pacang tedun, katepek antuk sang patut ngukulang;
  - ra. yening kalaning ngalungayang bhatara, mendak bhatara, bhatara turun kabeh, kalaning pacaruwan desa lwire manca-satha, manca sanak, tabuh gentuh ring desa, sami kulkule dados swarayang, tatepekan manut dresta;



- ka. sapa sira ugi mamurug, nepek kulkul tan manut dresta, yogya kabawosan antuk prajuru desa, katiwakang panglokika, saha pamidanda manut pararem.

### **Pawos 18**

Sapa sira ugi nepek kulkul tan sangkaning pituduh prajuru, patut gelis atur supeksa ring prajuru maka kabuwatan tatepekanya.

### **Palet 5**

### **Indik Druwen Desa**

### **Pawos 19**

- (1) Sane kadruwe antuk Desa Adat Panginyahan, luire:  
ha. Pura Puseh lan Pura Desa utawi Bale Agung;  
na. Pura Dalem lan Pura Prajapati;  
ca. Pura Bhujangga Sakti;  
ra. Pura Ratu Sakti Makolem;  
ka. Pura Tegal Suci;  
da. Palinggih Catus Pata;  
ta. Palaba Pura, telajakan Pura manut lekita;  
sa. Palemahan Setra;  
wa. Rurung Desa;  
la. Lembaga Perkreditan Desa;  
ma. Tatanguran;  
ga. Saluwiring piranti ring pura;  
ba. Lekita-lekita desa; lan  
nga. Saluwiring usaha sane kadruwe antuk desa.
- (2) Olih-olihan desa Adat luire:  
ha. saking pelaba pura;  
na. saking urunan krama desa Adat;  
ca. saking dana punia; lan  
ra. miwah siosan sane patut.
- (3) Saluwiring druwen desa patut wenten lekitanya.
- (4) Tan kalugra ngadol, ngantahang, ngesahang sahananing padruweyan desa yan tan kasungkemin antuk krama desa.

**Palet 6**  
**Indik Laluputan**  
**Pawos 20**

- (1) Luput mapiteges tan keni papeson lan piturunan, tan keni paayah-ayah salwiripun ritatkala desa ngangkat saraja karya, sajawaning piturunan wawangunan;
- (2) Krama desa sane luput luwire :  
ha. Prajuru desa;  
na. Sapa sira ugi sane kapineh antuk desa patut nyandang polih laluputan manut pararem;
- (3) Pamangku desa luput manuk.

**Palet 7**  
**Indik Dadosan Patedunan**

**Pawos 21**

Dadosan salwiring patedunan, tedun makarya miwah sane siosan, nganutang sukerta sowang-sowang, lwire :

- ha. Yening prajuru desa madruwe patedunane, yogya nganggen sukertan desa. Dadosan ngaranjing ka desa;
- na. Yening babanjaran madruwe patedunane, yogya ngangge uger sukertan banjar sowang-sowang. Dadosane ngaranjing ka banjar;
- ca. Yening sekaa-sekaa siosan madruwe patedunane, yogya ngangge uger sekeha sowang-sowang. Dadosane ngaranjing ka sekaa;
- ra. Sapa sira ugi tan tinut ring tatepasan dadosan punika, yogya katengahang babawose ka Desa. Prajuru desa wenang mamawosin.

**Palet 8**  
**Indik Rarampagan**

**Pawos 22**

Desa Adat wenang ngarampag manut sakabuwatan. Indike ngarampag malarapan antuk paruman desa, turmaning mangda supeksa ring sang maduwe utawi nyakap. Prade tan radin utawi tan suka, ngarampag punika patut kaandegang, prajuru desa wenang mamawosin.



**Palet 9**  
**Indik Bhaya**

**Pawos 23**

- (1) Sane kinucap Panca bhaya, lwir ipun :  
ha. Jiwa bhaya;  
na. Agni bhaya;  
ca. Toya bhaya;  
ra. Artha bhaya; lan  
ka. Bayu bhaya.
- (2) Salwiring bhaya wenang gegerak antuk swaran kulkul.
- (3) Sapasira ugi krama desa sane manggihin, wyadin huning ring panangkaning bhaya, ring sang katiben bhaya, wenang ngegerak nepek kulkul manut indik kakulkulan bhaya, raris damyakang ring krama desa.
- (4) Rikala wenten swaran kulkul bulus tatenger bhaya, krama desa patut yatna, sayaga, saha sregep ngamong prabot wiyadin gagawan manut bhaya.
- (5) Yening sampun tatas ring bhaya punika, krama desa patut matulung ring sang keni bhaya manut hunggwan, kalih manut patuduh sang yogya ngawiwenangang.
- (6) Sapasira ugi tan dados majajarah rikalaning krama desa katiben bhaya. Yening wenten kacirenan mamurug, yogya katengahang ka desa, wiyadin katur ring sang amawarat, mangda kabawosan.
- (7) Yening bhaya punika sampun nahnah utawi degdeg tan pacang nyangkalen, wenang kacihnayang antuk swaran kulkul lambat atuludan, wiyadin pasiar saking sang ngawiwenangang.

**Palet 10**  
**Indik Panyanggran Banjar, Krama Desa lan Sekaa-sekaa**

**Pawos 24**

- (1) Salwiring karya sane patut kasanggra antuk desa, banjar, kapastikayang paswaran desa, paswaran banjar, minakadi sekaa-sekaa siosan.

- (2) Saraja karya desa kasanggra antuk krama desa, kahunadikayang olih prajuru desa, saraja karya banjar kasanggra antuk krama banjar, saraja karya sekaa-sekaa kasanggra antuk krama sekaa sowang-sowang.

## **CATURTAS SARGAH**

### **SUKERTA TATA AGAMA**

#### **Palet 1**

#### **Indik Dewa Yadnya**

#### **Kaping 1**

#### **Indik Kahyangan**

#### **Pawos 25**

Sane kamanggehang Kahyangan Desa lwire:

- ha. Pura Puseh lan Pura Desa utawi Bale Agung;
- na. Pura Dalem lan Pura Prajapati;
- ca. Pura Bhujangga Sakti;
- ra. Pura Ratu Sakti Makolem;
- ka. Tegal Suci;
- da. Palinggih Catus Pata;

#### **Pawos 26**

- (1) Pura Kahyangan Desa kahempon antuk Desa Adat Panginyahan manut dresta.
- (2) Pura sane siosan, papayon utawi wawangunan miwah pangaci-aci kahempon antuk krama sane nyungsi Bhatara ring pura inucap.
- (3) Yening wenten karecehan utawi wicara sajroning pura, wenang katengahang ka desa, prajuru desa mamawosin mangda kasidhan mawali landuh jatimula.
- (4) Tan wenang nguwah nguwhin wawilangan palinggih bhatara sane sampun wenten ring pura kahyangan desa, mangda kantun manggeh kadi kuna.
- (5) Yening wenten pura kahyangan reneng pangaci-acinya kantos kadasawarsan, yogya prajuru desa mamawosin, ngutsahayang mangda kasidhan mawali kadi jatimula. Nanging prade tan



kasidhan, Desa wenang ngupakara mralina pura punika, mangda tan kaumahin antuk Bhuta Kala.

## **Kaping 2 Indik Pangaci-aci**

### **Pawos 27**

- (1) Indik pangaci-aci ring pura kahyangan desa, kahamongin antuk desa. Mungguwing dinan pangaci-aci manut gagaduhan pura punika.
- (2) Sane yogya muput aci-aci pura kahyangan desa, wantah pamangku kahyangan desa. Sajawaning karya mamungkah, ngenteg linggih miwah ngrsigana lan karya ageng siosan punika kapuput antuk sulinggih.
- (3) Indik pangaci-aci pura siosan ring kahyangan desa, manut gagaduhan pura sowang-sowang.
- (4) Yening wenten pura durung madruwe pamangku, utawi pamangkune kapialang, dados nuwur sinalih tunggil pamangku kahyangan desa, prade taler tan mresidayang, dados nuwur ida sulinggih.
- (5) Yening wenten karya ageng ring pura kahyangan desa, pamangku kahyangan desa wenang karombo antuk pamangku pura siosan.
- (6) Sapa sira ugi cedangga sane kabakta saking wawu mbas, tan kalugra ngaranjing ka genah panyucian.
- (7) Pasegeh tunggil Kajeng Kliwon, Purnama Tilem, kasanggra antuk pamangku sowang-sowang manut dresta.
- (8) Rikala tan mresidhayang ngaturang aci kadi patute, yogya prajuru desa miwah pamangku, ngaturang pihuning ring Bhatara manut dresta.

### **Pawos 28**

- (1) Aci-aci piodalan, pangusabaan miwah pasegeh ring pura kahyangan desa luwire :
  - ha. piodalan ring pura puseh miwah pura desa utawi bale agung ritatkala purnama sasih kalima;
  - na. pura dalem lan prajapati ritatkala tilem sasih kasanga;

- ca. pura bhujangga sakti ritatkala purnama sasih karo;
  - ra. pura ratu sakti makolem ritatkala purnama sasih kasa;
  - ka. tegal suci ritatkala tilem sasih keenem lan purnama sasih kapitu; lan
  - da. palinggih catus pata ritatkala tilem sasih kapitu;
- (2) Ritatkala jagate keni kabrebehan, kageringan, panca bhaya, pinganan tan mrasidayang ngaturang aci kadi patute, yoga prajuru desa miwah pamangku kahyangan desa ngaturang piuning ring ida bhatar, masadana babanten padhatengan, pacanangan, makacihna tan pegat aci-acine.
  - (3) Ritatkala ngayum papayon ring pura kahyangan prade tan puput kala dinaning piodalan, pangacine wenang rangkadang, nanging padhatengan, pacanangan tan dados pegatang. Riwus puput masesapuh salwire, malih mawali kadi nguni.

**Kaping 3**  
**Indik Sukertan Pura Kahyangan**  
**Pawos 29**

- (1) Wantah pamangku ring kahyangan punika sane dados munggah tedun ring palinggih-palinggih pura kahyangan inucap, sajawaning sang sampun polih lugraha saking pamangku pura inucap utawi prajuru. Yening wenten mamurug katiwakin danda manut pararem.
- (2) Pamangku sane patut ngantebang babanten ring pura, wantah Pamangku sane kadruwe antuk pura punika. Yening pamangku ring pura punika kapyalang, dados nuur pamangku siosan malarapan antuk palugrahan saking pamangku pura inucap utawi prajuru desa.
- (3) Tan kalugra masumpah, macoran sajroning pura kahyangan, sajaba sangkaning wicaran pura inucap, taler saking pabuwat krama desa sane ngempon pura kahyangan inucap.
- (4) Tan kalugra malaksana kantos ngawetuwang byota ring pura kahyangan. Yening wenten mamurug, patut keni danda manut pararem.
- (5) Tan kalugra ngamargiang upacara sane tan manut ring dresta.
- (6) Tan kalugra ngawentenang jajuden ring palemahan pura kahyangan. Yening wenten mamurug keni danda manut pararem, saha sang ngalaksanayang katur ring sang amawarat.



- (7) Tan kalugra makta salwiring sane kasinanggeh ngaletchin pura kahyangan. Yening wenten mamurug keni danda manut pararem.
- (8) Pura kahyangan tan wenang anggen sajaba ngalaksanayang upacara Agama Hindu. Yening wenten mamurug keni danda manut pararem.
- (9) Sapa sira ugi macihna katedunan utawi kapangluh ring sajeroning pura kahyangan patut kapintonin, yan tan yakti keni danda manut pararem.

**Kaping 4**  
**Indik Pamangku**

**Pawos 30**

- (1) Ring sowang-sowang pura kahyangan patut ngadegang pamangku.
- (2) Sane patut kaadegang dados pamangku inggih punika :
  - ha. tan cedangga;
  - na. tan macihna sungkan-sungkunan;
  - ca. tan mabukti nahen malaksana corah.
- (3) Pidabdab ngadegang pamangku :
  - ha. ngambil saking saserodan utawi katurunan;
  - na. saking pawuwus sasemburan utawi nyanjan;
  - ca. sangkaning kajujuh saha kabriyukin antuk krama desa.
- (4) Sapasira ugi krama desa sane kahadegang pamangku, yening kari alaki rabi, yogya lanang istri mawinten ring pura genahe kahadegang dados pamangku.
- (5) Pamangku patut madruwe hamongan pura.
- (6) Yening pamangku wekasan seda, patut kasanggra antuk krama desa manut pararem.
- (7) Sapa sira ugi kahadegang pamangku ring pura kahyangan, mangda pageh ngamel swadharmaning pamangku.
- (8) Olih-olihan pamangku, mungguh sajroning gagaduhan pura sowang-sowang.
- (9) Pamangku wusan utawi kagentosin majalaran antuk :
  - ha. Seda;
  - na. Pinunas ngeraga, tur polih lugraha saking prajuru desa, yan wekasan seda tan polih panyanggran desa;

- ca. Saking patut pinunase majalaran antuk tan mrasidayang ngamargiang swadharmaning pamangku, yan wekasan seda patut kasanggra antuk krama desa;
- ra. Mamurug sasananing Pamangku, yan wekasan seda tan polih panyanggran desa.

**Kaping 5**  
**Indik**  
**Cuntaka lan Sosot**

**Pawos 31**

- (1) Sapa sira ugi sane kahanan cuntaka, tan wenang ngaranjing ka pura kahyangan, miwah ring asing-asing kasinanggeh suci. Yening mamurug keni pamidanda manut pararem.
- (2) Sane kinucap cuntaka lwire :
  - ha. anak istri kalaning ngraja utawi kotor kain;
  - na. sang sane ngamargiang grahasta asrama selami durung mabyakawon;
  - ca. rama rena cuntaka sangkaning madruwe oka. Sane lanang, cuntaka suwene saking mbas anake alit kantos kepus odel. Sane istri cuntaka petang dasa kalih dina.
- (3) Pamangku tan kakeneng cuntaka yan sampun ngalang tengah.
- (4) Cuntaka malarapan antuk kasedayan :
  - ha. yening sang ngarepin miwah tunggil karang pomahan, suwen cuntakane selami tigang rahina saha kacihnayang antuk mararebuan;
  - na. sane polih matatulung, punah cuntakane macihna antuk malukat;
  - ca. yening sang manjing mijil ring umah sang ngaraksa sawa sangkaning majenukan, tan keni cuntaka waluya mapas sang makta sawa ring margi agung;
  - ra. yening wenten anak istri seda ngadut manik, kacuntakan wantah tunggil karang pomahan selami 42 dina.
- (5) Anak wetu sangkaning smara dudu utawi tan pawidhi widhana miwah sang sane ngembasang, kasinanggeh cuntaka. Suwenne cuntaka, salami durung wenten ngangkenin
- (6) Cuntaka sangkaning sakit ila utawi tan waras.



- (7) Sapa sira ugi sane cuntaka ngaraksa sawa, ritatkalaning wenten karya atma wedhana, wantah dados mabhakti ring sang patut bhaktinin, nanging tan wenang matatulung.
- (8) Yening cuntaka gamya gamana, keni danda manut pararem, saha wicarane kaaturang ring sang amawarat.

### **Pawos 32**

- (1) Indik sosot :
  - ha. sapa sira ugi pacang nahur sosot, patut kamargiang rikalaning piodalan tur kasupeksa saha kaupasaksi olih prajuru desa;
  - na. sapa sira ugi pacang nahur sosot ngaturang piodalan, tatangguran, sasolahan, miwah sapatunggalan ipun mangda kamargiang rikalaning piodalan, saha masadok ring prajuru desa sanistane asasih sadurung piodalan;
  - ca. kalapan ritatkala krama desa nahur sosot, manut dresta.
- (2) Aturan utawi punia marupa jinah miwah sane siosan, patut kahunadikayang olih prajuru desa.
- (3) Sasarin Canang kapupulang saha kahunadikayang olih Prajuru Desa.

### **Palet 2 Indik Rsi Yadnya**

### **Pawos 34**

- (1) Sapa sira ugi nangun karya Rsi Yadnya, patut supeksa ring prajuru desa.
- (2) Prajuru desa ngutsahayang ngawerdiyang kautaman Sang Hyang Aji.
- (3) Ri kalaning karya utama ring desa, sane kapuput antuk sulinggih, patut ngaturang punya manut dresta.
- (4) Sapasira ugi krama desa mapakayun pacang madwi jati patut masadok ring prajuru desa.

**Palet 3**  
**Indik**  
**Pitra Yadnya**

**Pawos 35**

- (1) Pitra Yadnya kamargiang manut Dresta, sakadi ring sor puniki :  
ha. mapendem ring pertiwi;  
na. makingsan ring geni;  
ca. atiwa-tiwa.
- (2) Upacara atiwa-tiwa sawa prateka wyadin nyuasta patut kamargiang ring setra Desa, sejaba Ida Sulinggih. Yan mamurug, wenang kadanda manut pararem.
- (3) Ring Desa Adat rikalaning atiwa-tiwa kadadosang ngurung sawa.
- (4) Tan wenang nyekeh sawa lintangan ring tigang rahina, wiyadin sane jaga mapendem utawi makingsan ngawit saking dinane seda.
- (5) Sapa sira ugi krama desa, tan wenang atiwa-tiwa rikalaning larangan desa. Yan mamurug keni danda manut pararem.
- (6) Krama desa mendem sawa rikalaning dina larangan desa, kadadosang laku kingsan, nanging ugi masawen, saha durung magagumuk.
- (7) Krama Desa kadadosang ngamargiang atiwa-tiwa makingsan ring geni.
- (8) Indik padewasan :  
ha. padewasan mendem ring pertiwi, makingsan ring geni, wenang katiwakang olih Klihang Desa;  
na. padewasan atiwa-tiwa ngaben, katiwakang olih Prajuru Desa, kapuput olih sulinggih;  
ca. tan wenang ngagah ngulung, teges ipun, nuju dina pangutangan ring setra punika wenten ngalaksanayang pangabenan, krama siosan tan dados mresihin sawa sajroning setra tunggil. Yening mamurug keni danda manut pararem;  
ra. tan wenang ngutang ngirim, teges ipun, yening wenten ngirim, tan dados sane siosan mendem sawa, minakadi atiwa-tiwa, ngaben, ring dina punika sajroning setra tunggil. Yening mamurug keni danda manut pararem.
- (9) Yening wenten sawa tan kaparihangken ring wawengkon desa, ngaran bedagan desa, yogya prajuru desa ngarauhang ring sang amawarat.



- (10) Yening wenten sawa genahe seda ring luaring karang paumahan, yogya sang madruwe wirange mrayascita marisudha genah punika. Yening sawa tan kaparihangken, genah punika patut kaparisudha antuk desa.
- (11) Sapa sira ugi krama desa sane wusan ngalaksanayang pangabenan, ugi mangda mareresik ring setra sakasepipun tigang dina saking pangabenane. Yan mamurug keni pamidanda manut pararem.
- (12) Sapa sira ugi luaring krama desa nganggen padruweyan desa, patut keni pananjung batu manut pararem.

### **Pawos 36**

Indik Angatma Wedana :

- ha. sapa sira ugi krama desa yening kalaning angatma wedana, tan wenang ngawangunang petak utawi payadnyan ring palemahan pura.
- na. sapa sira ugi wus ngawangun karya angatma wedana, yogya wawangunan yadnya ika kapralina, sakasepipun petang dasa kalih dina saking wusan karyane.

### **Palet 4**

#### **Indik Manusa Yadnya**

### **Pawos 37**

- (1) Sapa sira ugi krama desa ngawangunang salwiring upacara manusa yadnya, tan wenang magenah ring wawidangan palemahan pura, sajabaning pawintenan. Yening mamurug, keni pamidanda manut pararem.
- (2) Indik manusa yadnya sane dados kamargiang ring sajeroning desa Adat, ugi mangda nganutin dresta.

**Palet 5**

**Indik  
Bhuta Yadnya**

**Pawos 38**

- (1) Sajroning Desa Adat, bhuta yadnya kamargiang sekadi ring sor puniki, luire:
- ha. Pacaruan desa sadakala :
    - 1) Segehan;
    - 2) Eka Sata;
    - 3) Panca Sata;
    - 4) Panca Sanak;
    - 5) Rsi Ghana;
    - 6) Caru Lantaran;
    - 7) Panca Kelud; lan
    - 8) Tawur Agung.
  - na. pacaruan desa padgatakala rikala jagate macihna kabrebehan, kageringan, kadurmanggalan, katiben panca bhaya, miwah sane siosan;
  - ca. agung alit caru, manut sakabwatan.
- (2) Yening wenten pura kahyangan desa reneng pacaruane kantos tigang piodalan, krama desa patut maguru piduka mangda kasidhan ngaturang piodalan.
- (3) Pacaruan ring karang paumahan sowang-sowang manut dresta.

**PANCAMA SARGAH  
SUKERTA TATA PALEMAHAN**

**Palet 1**

**Indik  
Tegal lan Karang**

**Pawos 39**

- Palemahan Desa Adat Panginyahan mauger Trimandhala, luire :
- ha. Utama mandhala inggih punika palemahan sane kaanggen karang pura wiyadin parhyangan. Madya mandhala inggih punika palemahan sane kaanggen karang paumahan miwah genah wawangunan sane siosan. Nista mandhala inggih punika palemahan sane kaanggen setra, margi miwah sane siosan;



- na. Sahanan palemahan yogya mangda madruwe babaledan wiyadin wates sane pastika;
- ca. Sahanan palemahan punika, ugi mangda madruwe margi;
- ra. Yening wenten palemahan sane tan madruwe margi, sang madruwe patut ngatengahang babawose ka desa. Prajuru desa yogya ngutsahayang mangda polih margi malarapan sami suka. Yening patut matumbas, manut pangargan tanah sane kamanggehang antuk sang amawarat. Sami katahur antuk sang mamuwatang;
- ka. Yening desa pacang ngalinggahang utawi makarya margi sane nganggen palemahan druwen krama, saking sampun ingkup paswaran desa, wenang tan nahur pangargan tanah punika. Nanging yening madaging tatanduran, wawangunan salwire, desa patut ngicen prabeya, agung alit manut pararem;
- da. Sahananing karang pomahan mangda masengker. Pidabdab nyengker, magaleng ka dulu, teges ipun panyengker sane sisi kangin miwah kaler, patut kakaryanin antuk sang ngenahin karang punika. Sajaba karang ngele, lingkehin rurung, wiyadin palemahan suwung;
- ta. Sapa sira ugi ngenahin karang tegehan, patut naku, tegehe asukat natah dangsah. Sane tebenan, wenang nyusunin tembok;
- sa. Telajakan karang patut kapiara antuk sang ngenahin karang punika sowang-sowang, mangda mapikenoh tur asri;
- wa. Sapa sira ugi nyadya nyaleksek salwiring babaledan wiyadin wawatesan, yogya katiwakang danda manut pararem;
- la. Sapa sira ugi ngaletihin, ngarucakin, ngarobedin, palemahan tan padruwean nyane, yogya katiwakang danda manut pararem;
- ma. Sapa sira ugi ngenahin palemahan sajeroning wawengkon desa, tan tinut ring daging awig-awig miwah paswaran desa, tan kalugra nganggen salwiring padruweyan desa, ngalaksanayang panca yadnya ring sajeroning desa Adat;
- ga. Sapa sira ugi migunayang palemahan sane wenten ring wawidangan desa, patut matur supeksa miwah polih lugraha saking prajuru desa;
- ba. Sapa sira ugi pacang masakapang utawi nyakap palemahan tegal, patut ngarya pasobaya;
- nga. Sapa sira krama desa pacang ngadol, ngantahang, majegang, makedihang, nukarang, masewayang, maselangang miwah saluir ipun, palemahan sajeroning desa ugi mangda polih palugraha saking prajuru desa, yening mamurug keni pamidanda manut pararem.

## Palet 2

### Indik Kakayonan

#### Pawos 40

- (1) Ngawit nandur kakayonan tanem tuwuh, patut ameter tengah ngajeroang saking wates. Yening mamurug keni danda manut pararem.
- (2) Tan kalugra nebtob, ngrebah, wit-witan salwir ipun, ring palemahan sane kakeker antuk desa. Yening mamurug keni danda manut pararem.
- (3) Yening wenten wit-witan wiyadin kakayonan ngarobedin palemahan anak sios, asing karobedin wenang ngatengahang ka desa. Prajuru desa maritetes saha mituduhang sang madruwe mangda ngrancap, nebtob utawi ngarebah. Yening kantos ping tiga pituduh desa tan kalingu, wenang katiwakin danda manut pararem.
- (4) Saluwiring wit-witan sajroning karang pomahan, tan kalugra tegel ipun lintangan ring limang meter, bungkil ipun mangda adewa utawi ameter tengah saking panyengkere ngajrowang. Yening mamurug wenten ngatengahang ka desa, yoga sang madruwe katiwakin danda manut pararem.
- (5) Yening wenten wit taru mentik kantos ageng ring babaledan utawi wates, wenten ngatengahang ka desa, patut taru punika karebah, raris pinara manut pararem.
- (6) Yening wenten krama nandur tanem tuwuh ring tegal sakapan mangda matur supeksa ring sang sane madruwe tegal tur ngarya pasobaya sane pastika. Yening wenten mamurug pasobaya, wenang katengahang kadesa. Yening tan katinutin pamutus desa, wenang katurang ring sang amawarat.
- (7) Sapa sira ugi nyakap tegal, tan kawasa ngarebah tatanduran sane dados anggen lakar wawangunan, yan tan kalugra saking sang madruwe tegal punika.
- (8) Yening wenten wit-witan sane rebah antuk kapanca bhaya sajeroning pategalan tan druwe, tan dados kajarahin antuk sapa sira ugi. Yening wenten mamurug keni pamidanda manut pararem.



### **Palet 3**

#### **Indik Wawangunan**

#### **Pawos 41**

- (1) Sapasira ugi pacang ngawangun panyengker karang pomahan, patut masupeksa ring panyandinge. Yening tan radin, yogya nunas degdegan ring prajuru desa. Yening tan katinutin tatepasan Prajuru desa, wenang katurang ring sang amawarat.
- (2) Wawangunan ring palemahan sane sampun masanggah pawon, palemahan punika prasidha kabawos karang pomahan, dwaning sampun katiwakan pangupakaran karang.
- (3) Yening tan masanggah panguluning karang, kabawos akakubon. Tan yogya genah angraksa sawa. Yening mamurug, keni danda manut pararem.
- (4) Sapa sira ugi pacang ngawangun wawangunan genah ngalaksanayang upacara agama miwah sane siosan, mangda wenten lekita palugrahan prajuru desa. Yening mamurug, keni danda manut pararem.
- (5) Wawangunan sajroning karang pomahan, mangda nganutin tri mandala. Inggih punika utama mandala genah sanggah panguluning karang, madya mandala genah paumahan, nista mandala genah lebuw utawi jabayan.
- (6) Tan wenang ngungkulang cap-capan wawangunan ka jroning karang pomahan siosan tan druwe. Yening mamurug, yogya prajuru desa negdeg, saha nyipat gantungin. Yening jati lintang, sajroning selae dina saking puput babawose mangda sampun kapastika.
- (7) Tan wenang nganggen tembok umah wyadin tembok panyengker tan druwe. Wenang kasambatsara antuk sang madruwe. Yening akas tur mamurug sang kasambatsara, yogya katengahang ka desa. Kabawosan antuk prajuru desa.
- (8) Sapa sira ugi pacang mapawangun, yogya wenten lekita palugrahan saking amawarat, wiyadin likita palugrahan prajuru desa. Yening tan polih lekita palugrahan, padgatakala wawangunan punika dados katundungan tan ngetang prabheyan tatundungan.

- (9) Sapa sira ugi ngawengku karang paumahan, yogya urati myara kaasriyan lebuah pakaranganya, rurung pentasan pinih sor asukat karangnya ngalajur.

#### **Palet 4**

#### **Indik Wawalungan**

#### **Pawos 42**

- (1) Sane kinucap wawalungan inggih punika sakancan buron sane nyadya kapyara.
- (2) Sapa sira ugi sane myara wawalungan, tan wenang wewalungan punika kalumbar.
- (3) Sapa sira ugi ngangonang wawalungan ring palemahan tan druwe, patut masadok ring sang madruwe palemahan. Yening mamurug, keni pamidanda manut pararem.
- (4) Sapa sira ugi miara wawalungan, patut mratiyaksayang mangda tan ngawetuwang bhaya. Yening macihna mamayen keni danda manut pararem.
- (5) Sapa sira ugi miara wawalungan buwat adol atuku, wenang polih palugraha saking prajuru desa miwah sang amawarat manut pararem.
- (6) Yening wenten wawalungan ngarucakin, ngarug tatanduran, wenang taban. Sang madruwe tatanduran punika ngatengahang ka desa pramangkin, kabawosan antuk prajuru desa, saha katiwakang danda manut pararem.
- (7) Yening wenten wawalungan ngeleb, ngaranjingin palemahan pura kahyangan, setra, karang paumahan, patut lokikain. Yening tan nyadya kalebang, tan yogya taban, wenang kasadokang ring sang madruwe. Yening nyadya kalebang, wenang kataban, tur katengahang ka desa.
- (8) Sapa sira ugi tan kalugra nyorongang babanyon laleteh kandang wawalungan ka palemahan tan druwe. Yening mamurug keni danda manut pararem.
- (9) Tan dados maburu ring sawawengkon Desa Adat Panginyahan, sajawaning sane kabawos merana utawi sane kaanggen yadnya. Yening mamurug, keni danda manut pararem.



- (10) Sakancan dadandan sane mungguh ring ajeng, sami katur ka desa.

## **SAD SARGGAH**

### **SUKERTA TATA PAWONGAN**

#### **Palet 1**

#### **Indik Pawiwahan**

#### **Pawos 43**

- (1) Pidabdab pawiwahan sane kapatutang inggih punika :  
ha. Papadikan;  
na. Merangkat utawi Ngarorod; lan  
ca. Nyentana.
- (2) Sajroning desa Adat, indik pawiwahan punika kasinanggeh puput, yening sampun mawidhi widhana pawiwahan sanistanya mabiyakawon.
- (3) Yening wenten krama desa karangkatang, prade kantos tigang dina saking dina rangkate tan wenten pasadok pajati, yogya sang maduwe wirange nunas kanti ring prajuru desa, mangda ngamargiang paneregteg.
- (4) Sapa sira ugi krama desa karawuhan tamiu masinutan malarapan antuk ngarorod, ugi mangda masadok ring prajuru desa. Yan mamurug keni danda manut pararem.
- (5) Yening wenten krama desa mlagandang, tan yogya kapuput pawidhi widhananya sadurung wenten pamutus saking guru wisesa.
- (6) Yening wenten krama saking dura desa, pacang muput pawiwahan ka wawengkon Desa, sang madruwe wirange yogya nunas upasaksi ring prajuru desa.
- (7) Sapa sira ugi luaring desa ngambil krama desa Adat panginyahan patut naur suaran kulkul utawi suaran geheran gung artha manut pararem.

## **Pawos 44**

Nilar Sesana :

- ha. yening wenten krama desa mobotin, sane sami-sami nenten maduwe rabi, tur sampun kapariangken, mangda gelis majangkepan alaki rabi, tur mawidi widana pawiwahan kadi patute. Yening mamurug keni pamidanda manut pararem, saha wicarane kaserahang ring sang amawarat;
- na. yening wenten krama istri nenten maduwe rabi kabobotin antuk krama sane sampun marabian patut kajangkepan, yan tan kasungkamin keni pamidanda manut pararem saha wicarane kaserahang ring sang amawarat;

## **Palet 2**

### **Indik**

### **Belas Makurenan utawi Nyapihan**

## **Pawos 45**

- (1) Sane kabawos nyapihan inggih punika sang palas marabi, sane sampun katiwakang pamutus antuk guru wisesa;
- (2) Yening wenten krama desa ngarabiang sapihan tan kapatutang sadurung tigang sasih utawi 105 dina saking dina palase sajabaning sampun bobot, yan mamurug keni danda manut pararem;
- (3) Yening wenten krama desa marabian ka luaring desa, prade nyapihan mawali ka desanya kasinanggeh mulih daa. Yogya sang madruwe wirange mrayascita marisudha krama punika. Yening mamurug keni danda manut pararem.

## **Palet 3**

### **Indik**

### **Balu**

## **Pawos 46**

- (1) Sane kabawos balu inggih punika krama lanang utawi istri sane katinggal seda antuk rabinya, wenten balu masentana wenten balu tan masentana.



- (2) Yening wenten krama balu ngawengku karang, maduwe santana sampun hantes mayahan, yogya mayahan bulangkep.
- (3) Yening wenten krama istri balu mapawiwahan, yogya pawiwahan punika kapuputang antuk wirang lanange riin, yening krama balu punika kari pageh magenah ring wirang lanange.

**Palet 4  
Indik  
Sentana  
Pawos 47**

- (1) Krama Desa ngarajegang pidabdab sentana ka purusa. Sentana paperasan ngutamayang tunggal sidhikara.
- (2) Sapa sira ugi krama desa meras sentana, yogya sangkaning radin, kadulurin antuk upacara manut dresta tur kasaksiang antuk prajuru desa saha polih palugrahan saking guru wisesa.

**Palet 5  
Indik  
Warisan**

**Pawos 48**

- (1) Lwire sane wenang kawarisin :  
ha. among-amongan ring desa, ayah-ayahan saurah-arih;  
na. utang, piutang sang kawarisin;  
ca. saraja druwe.
- (2) Sane wenang ngawarisin :  
ha. sentana manut lalintih, papernahan adoh tampek saking purusa tunggal sidikara, tunggal dadya;  
na. sentana paperasan;  
ca. sangkaning polih pitemes saking sang kawarisin, salwir sane dados kawarisang, kasaksinin antuk guru wisesa, pinih akeh apahtigaan saking padruwen nyane.
- (3) Sapa sira ugi krama desa tilar saking Agama Hindu, tan yogya ngawaris.

**SAPTAMAS SARGAH  
WICARA LAN PAMIDANDA**

**Palet 1  
Indik  
Wicara  
Pawos 49**

- (1) Salwiring wicara indik Adat, wenang kabawosan antuk prajuru desa, yening tan kasidan puput, prajuru desa ngaturang ring guru wisesa.
- (2) Yening wenten wicara ring banjar utawi ring sekaa-sekaa siosan, yogya kabawosan antuk prajurunya sowang. Yening tan kasidhan puput, wenang katengahang ka desa, prajuru desa yogya mamawosin.
- (3) Yening pamutus wicara sane katiwakang antuk prajuru desa tan katinutin antuk sang mawicara, wenang katengahang ring pasamuhan desa. Prade pamutus pasamuhan desa tan katinutin, sang mawicara nunasang ring sang amawarat.

**Palet 2  
Indik  
Pamidanda  
Pawos 46**

- (1) Pamidanda sane wenang katiwakang olih prajuru lwire :  
ha. danda artha;  
na. danda ayah-ayahan;  
ca. upa saksi;  
ra. danda panyangaskara; utawi  
ka. pamidanda siosan manut pararem.
- (2) Patiwak pamidanda, manut unggwan wicarane sowang-sowang, lwire :  
ha. yening wicara ring desa, yogya kapidanda antuk desa, dadandan ngaranjing ka desa;  
na. yening wicara ring banjar utawi sekaa-sekaa siosan, katiwakin pamidanda antuk banjar utawi sekaa siosan, dadandan ngaranjing ka banjar utawi sekaa-sekaa punika.
- (3) Agung alit dadandan manut panglokikan werat ringan kasisipane sane munggah ring awig-awig manut pararem.



**ASTAMAS SARGAH**  
**NGUWAH-NGUWUHIN AWIG-AWIG**

**Pawos 47**

- (1) Sane wenang uwah-uwuhin, inggih punika, pasukertan, paswara, pamutus parareman wiyadin pamutus pasamuhan miwah sane siosan sapanunggilan ipun.
- (2) Indik nguwah-nguwuhin pasukertan, paswara, pamutus parareman wiyadin pamutus pasamuhan miwah sane siosan, manut tata kramaning pasamuhan.
- (3) Indik nguwah-nguwuhin Awig-awig, manut tata kramaning pasamuhan sasampun nunas tatimbang kalih polih palugrahan saking sang amawarat.

**NAWAMA SARGAH**

**PAMUPUT**

**Pawos 48**

- (1) Awig-awig puniki mawasta Awig-awig Desa Adat Panginyahan.
- (2) Awig-awig puniki pinaka bantang sahananing awig-awig, paswara, pasukertan, miwah salwir ipun, sane mangge ring sowang-sowang banjar miwah sekaa-sekaa siosan, sajroning Desa Adat Panginyahan.
- (3) Banjar miwah sekaa-sekaa siosan wenang ngawangunang awig-awig, paswara, gagaduhan sowang-sowang, nanging daging ipun tan dados tungkas ring awig-awig desa.
- (4) Salwiring sane durung kinucap ring awig-awig puniki, kaunggahang sajroning pararem.
- (5) Dresta sane dados angge, yening tan tungkas ring daging Awig-awig Desa Adat Panginyahan, manut kojaring sastra Agama Hindu, anut ring uger-uger negara, saha kaputusan sajroning paruman desa.
- (6) Awig-awig desa puniki, pawangun Krama Desa Adat Panginyahan, kapastika manut Upacara Agama Hindu, kala dina ;  
..... ring....., kapuput antuk  
Ida.....

- (7) Awig-awig puniki kalinggatanganin antuk prajuru desa, minakadi kliang desa, pamaden kliang desa, panyarikan, saha kasarengin antuk keliang-keliang banjar Adat, tur kasaksinin antuk Perbekel Desa Panginyahan, Camat Kubu, kakukuhang antuk Bupati Karangasem.
- (8) Awig-awig puniki kalaksanayang ngawit dina pasupati :..... kantos salantur ipun.
- (9) Luwir sang ngalinggatanganin :

ha. Kapertama : Prajuru Desa Adat Panginyahan :

Prajuru Desa :

Penyarikan,

I Nyoman Kanca, S.Pd

Juru Raksa,



I Nyoman Astawa, S.Pd.M.Si

Bendesa Adat Penginyahan

I Nyoman Sumaarsa

na. Kapingkalih : Pemangku, Kertha Desa , Pecalang Truna Truni

Ketua Paiketan Pemangku

Jro Mangku Gede P. Gunawan

Ketua Kertha Desa

I Made Merdana W.

Ketua Truna - Truni

I Wayan Simpen

Ketua Pecalang

I Gede Widi Widana



ca. Kaping tiga : Prajuru Dinas maka saksi

Kepala Wilayah  
Banjar Dinas Penginyahan

Perbekel  
Desa Tianyar Tengah

I Ketut Sudarmawan, S.H

I Ketut Ada

Camat Kubu

I Nyoman Suratika, S.Sos.,M.A.P  
Pembina  
NIP. 19651016 198602 1 002

Bupati Karangasem maka murdha pamikukuh  
Mengetahui dan telah di catatkan:  
Tanggal :  
Reg. No :

Bupati Karangasem

I Gusti Ayu Mas Sumantri, S.Sos.,M.A.P